

Minister di Infrastructura Benny Sevinger

Ta repasa proyectonan pa San Nicolas

ORANJESTAD - Minister di Infrastructura Benny Sevinger recientemente a repasa riba diferente proyectonan y asina tambe ta cubri e parti pa San Nicolas.

Prome cu a asumi mando di e pais, ya caba miembronan di Gabinete Mike Eman, en particular Prome Minister Mike Eman y Minister di Infrastructura, Benny Sevinger a haci un estudio di e estado di infrastructura riba nivel nacional y a constata cu mientras cu e sector hotelero ta uno di nivel halto, e resto di e pais a keda hopi atras.

E proyectonan cu ta actualmente den ehecucion ta yega un cantidad di casi 100 y ta reparti riba henter e territorio nacional, cu e concentracionnan di mas grandi obviamente na Oranjestad y San Nicolas como e ciudadnan cu mas concentracion di poblacion y mas necesidad di un infrastructura renoba. Enfocando riba e parti di San Nicolas, tin varios proyecto cu a keda cla of ta kedando cla pronto, ademas di otro grupo mas grandi cu ta den proceso pa inicia su ehecucion. E siman aki mes, ta haci entrega oficial di e proyecto di Watertoren na San Nicolas. E edificio totalmente renoba ta bay fungi como un museo di companianan di utilidad, entre otro funcion.

Otro proyectonan cu ta hopi avansa of ya caba finalizando ta e embeyecemento di Village Fase 1 y Fase 2, complehonan di Yuwana Morto, De Vuyst y Pos Chikito, e ultimo tres den colaboracion cu FCCA. E Carnival Museum su diseñonan a keda cla. Awo ta bay na evaluacion pa destaho publico. E locacion di e museo ta caminda tabata Green Hill Supermarket un poco mas pariba di rotonde di San Nicolas. E proyecto ta inclui espacio pa gruponan di Carnaval por traha riba nan disfraz y otro piezanan.

Proyecto di Joe Laveist Sport Park ta reparti den tres fase. Fase number 1 su gunning ta cla pa drecha loka ta deteriora den e proyecto mientras cu Fase 2 ta enfoca riba ampliacion di e facilidad. Finalmente Fase 3 tambe ta acomoda e facilidadnan cu consecuentemente scolnan por haci uso di dje pa actividad deportivo, pero tambe cultural y educativo. E gunning advies ta biniendo cla pa duna e contratista cu a gana e destaho publico.

Bayendo un poco mas pariba, ta haya Lago Heights Hill Park cu esnan cu pasa eybando por a ripara cu nan a cuminsa haci e tereno limpi. Aki ta bin un parke recreativo. E compania local Van Kessel ta esun cu a gana e destaho pa e proyecto

y den e proximo lunanan lo keda cla. Minister Sevinger a confesa cu esaki ta un di e proyectonan cu e tin hopi entusiasmo p'e ya cu lo ofrece e comunidad di San Nicolas un parke nobo y punto di encuentro pa e ciudadanonan.

Cruzada Pastoor Hendrikstraat, un proyecto importante pasobra e caya ta peligroso. Lo drecha full e entrada. Contratista local Mantbraca a gana e destaho publico y e ta den fase final di gunning. E trabounan ta bay full ariba

casi te na Lago Heights Hill Park. Riba e trayecto di e arteria vial aki lo pone varios plateau cu e intencion di obliga automobilistanan pa baha velocidad y haci posibel cu hende por crusa caminda di un manera mas sigur. □